

Dari Sebulan ke Sebulan

Presiden Sukarno pada bulan yang lalu telah melawat Rusia. Di dalam lawatan itu apabila sampai di sebuah negeri umpamanya di Moscow Presiden Sukarno telah diminta bawa melawat ke masjid. Begitulah apabila beliau sampai di Stalingrad beliau telah meminta melawat masjid-masjid di sana. Dengan demikian maka suatu lawatan telah diatur dan menurut kenyataan penulis harian "Abadi", suatu perkara yang sangat-sangat menyediakan ialah apabila mereka sampai ke situ sebagaimana biasa apabila masuk ke masjid mereka membuka kasut, ataupun kalau tidak di sana disediakan kasut-kasut bersih yang digunakan di dalam masjid itu. Mereka melakukan apa yang dibiasakan mereka tetapi tukang-tukang gambar dan orang-orang yang mengalau-alukan Presiden Sukarno masuk ke dalam masjid itu dengan sepatu yang kotor, tukang gambar dengan tidak ada tertib memijak tikar-tikar permaidani dengan sepatu-sepatu yang kotor. Yang demikian ini adalah sangat-sangat menyediakan hati mereka dan kerana itulah mereka yakin bahawa namanya sahaja masjid tetapi kehormatan masjid itu tidak ada lagi. Tuan Zainal Abidin Abbas wakil parliment bersama-sama di dalam rombongan itu berkata bahawa Islam di Rusia ialah semakin malap – yang bersembahyang bersama-sama mereka adalah orang yang tua-tua sahaja.

* * *

Ketua Staf Angkatan Darat Indonesia telah mengeluarkan suatu surat perintah yang menyatakan bahawa surat khabar atau penerbitan yang mengecam kerajaan Indonesia boleh dihukum sehingga 10,000 Rupiah. Undang-undang yang umum ini yang dikeluarkan oleh tentera sifatnya dipandang

oleh wartawan-wartawan Indonesia sebagai suatu undang-undang diktator. Tentera mengambil kekuasaan di dalam pemerintahan am yang terbit kerana banyaknya kritikan-kritikan yang timbul oleh banyaknya kecurangan-kecurangan.

Undang-undang seperti ini kesudahannya telah membawa dua wartawan iaitu Tuan Mochtar Lubis dan Rosihan Anwar dipanggil untuk memberi keterangan. Tuan Mochtar Lubis dengan terang-terang menyatakan bahawa ia sengaja mengeluarkan suatu risalah mengecam pemerintahan Indonesia dengan tujuan supaya ia dikenakan hukum pengadilan negeri yang tengannya dapat ia mengemukakan kepada ramai bahawa undang-undang yang dibuat oleh ketua setiap angkatan darat itu bersifat diktator dan memecahkan pengertian demokrasi di Indonesia.

Bagi kita "surat perintah" ini adalah menimbulkan suatu tertawaan kerana kononnya Indonesia bersifat kerajaan demokrasi tetapi akhbarnya dikongkong. Kita di dalam jajahan Inggeris boleh dan bebas mengkritik kerajaan dengan seluas-luasnya asalkan sahaja kritik itu tidak untuk membangkitkan suatu aliran untuk menumbangkan kerajaan dengan kekuatan senjata (*Sedicis Ordinance*) dan juga dalam perkara-perkara yang boleh disifatkan mencerca (undang-undang *level*). Adakah di Indonesia kedudukannya lebih dahsyat dari jajahan ini? Kalau mahu tahu lebih lanjut tanya kepada konsul jeneral Indonesia di sini.

* * *

Harian "Pembangunan" di Pontianak telah meriwayatkan satu perkara yang harus tidak pernah berlaku

di semenanjung ini dalam mana seorang Ketua Kampung Teluk Batang, daerah Simpang Hilir Ketapang, Kalimantan Barat, telah menggadaikan sebuah masjid kepada seorang pedagang kerana ketua kampung itu ada berhutang sebanyak 911 rupiah 50 sen. Hal ini diketahui apabila umat Islam di kampung tersebut akan melakukan sembahyang Jumaat dan mereka terperanjat di hadapan masjid itu tertulis nama orang itu mereka baharu mengetahui bahawa lurah kampung yang tersebut telah menggadaikan masjid itu dan untung juga pada hari itu Pegawai Daerah dapat mengamankan perasaan penduduk kampung itu dengan meneruskan sembahyang Jumaat di situ dan kemudian penduduk kampung membantah sikap Ketua Kampung menggadaikan masjid itu.

Ini adalah menunjukkan bahawa kemelaratan di Indonesia menjadi sebab utama sehingga terpaksa melakukan pekerjaan-pekerjaan yang dahsyat itu. Sedang di sebalik itu pegawai-pegawai Indonesia di luar-luar negeri, di konsulat-konsulat, gajinya besar, mewah dan tidak pula tahu bercampur di dalam masyarakat – jangankan penduduk-penduduk di Malaya sedangkan dengan himpunan mereka sendiri pun demikian juga. Seorang berkata lihat sahaja dalam istiadat kematian yang dilakukan mereka sudah menyalahi adat apalagi agama Islam. Inilah sebabnya mengapa orang-orang yang mengetahui suka kalau di Malaya ini dihantar oleh pemerintah Indonesia orang-orang yang mengerti agama supaya jangan perbuatan-perbuatan mereka itu menyolok mata.

* * *

Adakah Presiden Sukarno itu diktator? Ini ialah pertanyaan-pertanyaan yang telah timbul di dalam lingkungan orang-orang Indonesia sendiri. Sebabnya ia selalu membuat sesuatu dengan bersendirian – tidak setahu atau tidak persetujuan parlimen. Baharu-baharu ini dikatakan

dengan persetujuannya Menteri Luar Negeri Indonesia telah menandatangani kenyataan bersama dengan Soviet Rusia yang mana telah menerbitkan perkara tidak senang hati di Indonesia. Juga hingga hari ini undang-undang anti makan suap (*corruption*) belum dapat berjalan kerana sekalipun dalam masa kabinet Boerhanoeddin Harahap telah disahkan namun Presiden enggan menandatangani undang-undang itu. Perkara ini adalah perkara yang besar sekali dan mustahak dipandang oleh umat Indonesia kerana telah banyak berlaku pemimpin menjadi kaya raya dengan seketika dan mendapat kemudahan-kemudahan dari pemerintahannya. Banyak perkara-perkara yang menyenangkan sebahagian pihak dan menjadi kesusahan serta kemelaratan kepada pihak-pihak yang lain.

Kalau sebahagian pemimpin-pemimpin berjalan dengan motokar-motokar besar maka di dalam bandar Jakarta sendiri tidak dapat nafikan bahawa banyak penduduk yang tidak berumah, ditumpang tidur dan berumahtangga di bawah-bawah jambatan dengan keadaan yang sangat mendukacitakan.

Keadaan memewahkan sebahagian dan tidak mengendahkan sebahagian itu tidak dapat dinafikan meskipun Indonesia telah 11 tahun merdeka. Adakah menjadi sebab Presiden kalau menandatangani itu banyak orang-orang yang seperjuangan dengannya akan terlibat di dalam undang-undang itu?

* * *

Perkara Presiden berjalan ke sana ke mari, ke Amerika kemudian Rusia dan China sudah tentu memakan banyak belanja. Ke Amerika belanjanya yang ditanggung negara sebanyak 6 million setengah dan ke beberapa negeri di Eropah harus lebih dari 10 million rupiah. Orang-orang yang mengetahui keadaan di ibu negeri Indonesia sendiri masing-masing hairan bagaimana boleh berbelanja dengan mewah padahal di sebalik itu rakyat menderita dengan hebat, pembangunan tak dapat dijalankan dengan



Jamuan ringan di pejabat al-Madrasah al-Masriyyah, Bukit Mertajam. Di tengah-tengah ialah Menteri Muda Hasil Bumi dan Kerajaan Tempatan Persekutuan, A Abdul Rahman Talib (sedang memegang cawan), di kanan beliau: Tuan Haji Ahmad Fuad dan Raja Musa dari pejabat agama Perak. Manakala di kiri beliau pula ialah al-Ustadh Soleh Osman Perlis, Tuan Haji Hassan Yunus Jawhar, dan Syed Jaafar Albar.

* * *

sempurna atau hampir-hampir tak ada langsung. Kakitangan-kakitangan Kementerian Luar Negeri pun lebih senang duduk di luar negeri seperti di Singapura ini dalam mana gaji-gaji mereka tentulah besar jika dibandingkan dengan gaji-gaji di dalam negeri. Perbezaan gaji-gaji antara local dengan yang berasal dari Indonesia pun bertinggi berendahnya dan demikian juga cara-cara berkasta telah hidup dalam pejabat luat negeri apalagi dalam perkara-perkara yang mengenai hal-hal yang terdiri kerana mengutamakan parti masing-masing. Adakah diharap dengan cara-cara ini Indonesia akan menjadi negara makmur sebagai yang dicita-citakan?

* * *

Perkara kepartaian itu sangat-sangat merebak di seluruh masyarakat Indonesia. Kalau yang begitu berlaku bagi orang bawahan tidaklah menjadi satu perkara yang boleh dipandang merosakkan tetapi itu berlaku pula di dalam lingkungan-lingkungan orang yang terkemuka dan terpelajar. Buktinya dapat dilihat bahawa dalam masa Kongres Ketiga Persuratan dan Bahasa yang telah diadakan di Singapura baharu-baharu ini, dua golongan yang dihantar dari sana – satu dari Kementerian Agama: Tuan Hamka dengan satu suratnya dan yang kedua golongan enam orang yang diketuai oleh Prof Priyono. Kerana pertelingkahan itu maka dengan satu cara yang menunjukkan bahawa ia adalah satu golongan yang rasmi maka

Prof Priyono dalam penutup Kongres di dalam ucapannya di hadapan umum mengatakan bahawa ia bersama-sama dengan lima orang rakannya adalah utusan rasmi dari pemerintah Indonesia dengan surat dari Kementerian P. P. dan K. (Kementerian Pelajaran dan Kebudayaan) yang disahkan dengan surat dari Perdana Menteri sendiri.

Orang-orang bertanya: Apakah erti surat-surat kuasa itu disebut di hadapan umum? Apakah orang di sini tidak mengerti kedudukan itu lalu dengan tidak segan-segan membongkar keadaan itu di hadapan umum? Inilah perkara kepercayaan yang timbul atau ditimbulkan oleh seorang profesor dari

Indonesia. Sedang ia sendiri melihat bahawa di dalam Kongres Ketiga Bahasa dan Persuratan Melayu itu orang-orang Melayu dapat bersatu dengan meninggalkan faham dan pengertian masing-masing – berbahas dengan kasih mesra dan persaudaraan. Adakah profesor itu tidak tahu bahawa pengaruh kepartaian di sini sangat hebat sedang tatkala berunding untuk maslahat bangsa mereka boleh bersatu?

* * *

Sepulangannya ke Indonesia Prof Dr. Priyono di dalam kenyataannya kepada akhbar mengatakan bahawa ia puas hati dengan keputusan dan cita-cita yang penting dari Kongres Bahasa dan Persuratan Melayu Malaya yang telah diadakan di Singapura itu ialah tentang tujuan menyatukan bahasa Melayu dan bahasa Indonesia, “Sehingga Malaya dan negara Indonesia mempunyai bahasa yang satu dan sama.”

Katanya, “Dipandang dari sudut itu sahaja kongres itu adalah satu kongres yang sangat penting.” Tatkala menyebut tentang ejaan dan tatabahasa Dr Priyono mengatakan: “Rupa-rupanya saudara-saudara kita

di Tanah Melayu telah lebih progresif daripada kita sendiri.”

Ini satu akuan yang baik dari ketua rombongan Indonesia itu dan dengan kerana itu kita di Semenanjung Tanah Melayu ini janganlah lekas memandang bahawa dalam segala-galanya Indonesia lebih daripada kita. Sekiranya di sini ada kerjasama di antara pemerintah dengan rakyat tentulah banyak perkara-perkara yang mengenai persuratan atau lainnya yang akan berjalan tidak kalah dengan orang-orang di Indonesia sebab kita juga mempunyai kebolehan dan banyak pula pergaulan-pergaulan yang membuka mata kita kepada kemajuan; tetapi apakah daya kerana kita duduk dalam penjajahan.

* * *

Front anti-Komunis di Indonesia yang diketuai oleh Kiyai Haji Muhammad Isa Anshari di dalam mesyuaratnya di Bandung di antara lain-lain mendesak supaya pemerintah Indonesia memerhati dan menyiasat dengan saksama tentang pelajaran-pelajaran di sekolah-sekolah bangsa asing. Langkah ini sangat perlu dan mustahak pula diperhati oleh kerajaan khususnya kerajaan Persekutuan Tanah Melayu supaya apa yang terjadi di Singapura menjadi gambaran bagi Persekutuan bagaimana sekolah-sekolah umum itu menghidupkan pengertian-pengertian Komunis di dalam tanah air kita ini. Mustahak, sebelum keadaan-keadaan merebak seperti di Singapura, kerajaan Persekutuan Tanah Melayu mengadakan pembersihan unsur-unsur itu dalam sekolah-sekolah umum. Tidaklah ada erti kita bermati-matian mempertahankan maslahat negara terjauh dari Komunis sedang di sekolah-sekolah diajar dan dipupuk semangat-semangat itu.

* * *

Langkah yang diambil oleh Menteri Pelajaran Singapura terhadap Sekolah Menengah Cina untuk menghapuskan



Pelajar-pelajar "Madrasah Indonesia" di Makkah al-Mukarramah bergambar ramai dengan Pegawai Haji dan Kementerian Agama Indonesia. Duduk (baris kedua) nomor tiga dari kanan ialah al-Ustādh Khalil Ashari, wakil pegawai haji Indonesia. Di tengah-tengah (bersongkok) hitam dan bercermin mata) ialah al-Ustādh 'Abd al-Jalīl Maqdisī mudīr "Madrasah Indonesia", dan di belakang sekali, pertama dari kiri, ialah wakil "Gapis".

Kiriman saudara Soleh Abdul Rahman, Ketua Gabungan Penuntut, Kirup: al-Shaykh Ḥamzah 'Abd al-Safā' Makkah al-Mukarramah.

Komunis adalah sangat mustahak kerana dengan langkah yang tegas itulah sahaja dapat kita melihat akar-akar atau benih-benih pengertian Komunis itu dicabut dan dibersihkan. Kita berharap langkah-langkah itu dijalankan dengan lebih tegas lagi dan kita percaya umumnya rakyat akan menyokong langkah-langkah itu seratus peratus sebab punca-punca segala keburukan dan kerosakan di negeri Singapura ini sudah teranglah daripada anasir-anasir Komunis sama ada di dalam lingkungan orang-orang Cina ataupun dalam lingkungan orang-orang Melayu dengan menghidupkan anasir-anasir itu setapak ke setapak.

* * *

Perayaan maulid telah diadakan di Singapura dengan satu perarakan yang panjang. Ini adalah menunjukkan kecintaan umat Islam kepada junjungan kita Muhammad (SAW). Hanya sanya perkara yang patut diperhatikan bahawa sesudah berjalan begitu jauh di dalam panas di Jumaat diadakan ucapan yang panjang berleret-leret dan banyak pula bahasanya. Tidakkan terpikir oleh pengelola maulid *nabiyy sharīf* itu bahawa orang sudah penat, sudah berpanas begitu lama sedang ucapan-ucapan yang diberikan tidak didengar mereka. Mudah-mudahan di lain tahun ucapan yang diberi sekadar dua bahasa sahaja iaitu Melayu dan Tamil kerana mereka orang yang ramai menyambut maulid itu. Mudah-mudahan mendapat perhatian yang saksama.

* * *